

Otkrivanjem Spomen obilježja za 22 stradala stanovnika obilježena je danas 19. godišnjica od masakra u Lješevu. Predstavници MZ Lješevu upriličili su niz prigodnih sadržaja - Manifestacija pod nazivom „Da se ne zaboravi“ počela je u subotu, 04. juna, malonogometnim turnirom za djecu, a nastavljena kod spomen obilježja u 19 sati promocijom knjige "Kad bi kosti mogle govoriti", autora prof. Saliha Smajlovića. Na istom mjestu u 20 sati prikazan je dokumentarni film Avde Huseinovića "Vanzemaljci nad Sarajevom".

- Danas kada nam svima naviru tužna sjećanja, želim da poručim mladim naraštajima da ih samo znanje može dovesti do uspjeha i da čuvaju našu historiju. Nikakav sud, historijski dokument ili pojedinci nisu potrebni da posvjedeče istinu o zločinima koji su počinjeni širom Bosne i Hercegovine, jer to će zauvijek svjedočiti grobovi nevinih žrtava, kazao je Mirzet Repuh, jedini preživjeli svjedok stradanja.

Svima koji su doprinijeli uspješnom završetku projekta izgradnje Spomen obilježja uručene su zahvalnice.

- Kraj maja i mjesec juni 1992. godine je period kada su se na području općine Ilijaš desili strašni zločini. Počelo je zločinima u Bioči, nastavljeno zločinima u Lješevu, Luci, Kadarićima itd. Jedan od strašnih zločina desio se u Lješevu, kada je nad 24 stanovnika izvršeno klasično strijeljanje. Jedna nana svjedok je već umrla i ostao je samo jedan preživjeli sudionik. Sve što je bilo porušeno, ipak ćemo obnoviti, ali ne možemo vratiti ljude. Ove godine smo u prilici da otvorimo drugo spomen obilježje u koje je uloženo oko 80 hiljada maraka, to je način da se ne zaboravi, ali ne da bi se svetili nego da nam se nešto slično ne ponovi. Za nas je neprihvatljivo, ali niko za ovaj zločin još nije odgovarao, još jednom pozivam da se procesuiraju krivci i da neko bude kažnjen, poručio je načelnik Općine Ilijaš Nusret Mašić.

Nakon prigodnog programa, svi prisutni su sa mjesta zločina obišli mezarje gdje su stradalima proučili fatihu i još jednom odali počast .

U Lješevu su ubijeni : **Ćamil i Izet Avdukić, Suljo, Munira, Hasan, Arif, Meho, Safet, Ibrahim, Huso i Amir Fazlić, Husnija, Mujo, Jasmin, Mensud, Fadil, Mehmed i Munir Masnopita, Arif Omanović, Zubejda Suljić, Nijaz Nuhić i Asim Karavdić.**